

Meeqqanut sumiginnagaasimasunut, taamatullu kinguaassiutitigut innarlerneqarsimasunut siusissukkut piukkunnaateqartumillu katsorsaanissamut neqerooruteqarnissaq, allatigullu ikorfartuisinnaaneq qanoq ililluta qulakkeersinnaaneripput pillugu apeqquteqaat aallaavigalugu oqallinnissamik siunnersuut.

(Inuit Ataqaatigiit Inatsisartunut ilaasortaaitai)

Akissuteqaat

(Isumaginninnermut, Ilaqutariinnermut; Naligiissitaanermut Inatsisinillu Atuutsitsinnermut Naalakkersuisoq)

Naalakkersuisut siunnersuummut pingaaruteqaqisumik qitiutitsilersumut qujassuteqarput.

Siusissukkut pitsaassuseqartumillu katsorsaanissamik neqerooruteqarnissap qulakkeernissaanik siunnersuuteqartut Naalakkersuisut isumaqatigaat. Naalakkersuisut neqeroorutininik amerlaqisunik assigiinngiaartunillu pisariaqartitsisoqarmat suliniutinik aallartitsereerput.

Meeqqat tapersorneqarnissaannut meeqqanik sumiginnagaasimasunik, matumani kinguaassiutitigut atonerlunneqarsimasut ilanngullugit, ikorsiinissamut inatsisit nutaat tunngavigalugit nukittorsaavigineqarput. Meeqqanut tunngatillugu inatsisiliornermi nalinginnaasuvoq, meeqqanik pinerliisimannginnermut uppersaammik aammalu pinerluuteqarsimannginnermik uppersaammik piumasaqaateqartarneq kiisalu pitsaanerusumik nakkutilliisalerneq.

Sumiginnaanermut ilaqutariit nukissaalatsinerat pissutaasinnaavoq, taassumalu angajoqqaatut piginnaasaat nukillaartissinnaavai. Kommunini sulianik suliarinnittut angajoqqaatut piginnaasanik misissuinnermut piginnaasaqarnerulersinniarlugit, Naalakkersuisut sulianik suliarinnittunik pikkorissaatitsisarput. Angajoqqaatut piginnaasanik misissuinerit pitsaaneruppata, angajoqqaat meeqqaminnik isumassuinnerminnut atatillugu nukissat atorsinnaasaat paasinarsisinneqarsinnaapput.

MANU angajoqqaanngortussanut piareersarnermut suliniutaavoq, meerartaartussanullu tamanut sammititaalluni. Suliniut taanna Naalakkersuisut nukittorsarusuppaat, isumaginninnermut tunngasunik sammisaqarfimmik ilaneratigut, tassani meeqqat aarlerinartorsiortut, angajoqqaanngulersut ilaqutariillu qitiutinneqassapput.

Meeqqanut kinguaassiutitigut atonerlunneqarsimasunut atatillugu, suliniutit arlaqartut aallartinneqareerput. Suliniutinut ilaapput meeqqanik kinguaassiutitigut atonerlunneqarsimasunik oqaloqateqarnerit sulianik suliarinnittut angajoqqaallu siunnersornerannut ikorfartuutaasut qanoq

ingerlatsisinnaanersut.

Inersimasut meeraanermi kinguaassiuutitigut atonerlugaasimasut pillugit angalaqatigiittartut misilittagaqarluarfiginerat tunuliaqutaralugu, Naalakkersuisut 2016-imi meeqqat inuusuttullu kinguaassiuutitigut atonerlugaasimasut katsorsarniarlugit angalaqatigiittartunik Qeqertarsuarmi, Uummannami, Upernavimmi Qaqortumilu suliniuteqartitsipput. Soorluttaaq Naalakkersuisut 2017-ip aasaaneraniilli meeqqanik atonerluisarnermik pitsaaliuisunik suliniutinik ataatsimoortunik ingerlataqarsimasut.

Naalakkersuisut tamatuma saniatigut isumaqarput, oqartussaaffiit attuumassuteqartut tamarmik meeqqanik kinguaassiuutitigut atonerluinernik akiuiniarnermik qitiutitsilernissaat pingaaruteqarluinnartoq. Ilaatigut politiit/inatsisunik atuutsitsisut atonerluinernik sulianik suliarinnittarnerat taaneqarpoq.

Kalaallit Nunaanni Eqqartuussiveqarneq pillugu Siunnersuisoqatigiit september 2017-imi Tasiilami ukiumoortumik ataatsimiinnermimi meeqqanik kinguaassiuutitigut atonerluinerit akiorneqarnissaannik sammisaqarmata pitsaasuvoq. Oqartussat qanoq iliorlutik meeqqanik atonerluisarnermut tunngasunik suleqatigiinnerup nukittorsarneqarsinnaanera oqaloqatigiissutigissagaat anguniagaavoq.

Maani aamma oqaatigineqassaaq meeqqat amerlaqisut angerlarsimaffimmi sakkortuumik sumiginnagaaneq pissutigalugu angerlarsimaffiup avataanut inissineqartarmata. Meeqqat ilaqutariinnut paarsisartunut inissineqartut atugaat sapinngisamik pitsaanerpaanissaat qulakkeerniarlugu, ilaqutariinnut paarsisartunut periusissaq Naalakkersuisut maanna ilusilersorpaat. Meeqqanut sumiginnagaasunut taakkununga ilaqutariittut paarsisartut suliasat pitsaanerusumik isumagisnaajumallugit ilaqutariit paarsisartut nukittorsaaviginissaat pisariaqartitat ilagivaat.

Suliniutit taakku arlaqaqisut ukiut qulit ingerlaneranni angerlarsimaffiup avataanut inissiisarnerit 7 %-imit 2,5%-imut appartissinnaajumaaraat Naalakkersuisut anguniagaraat.

Kommunit isumaginninnermik suliniarnerat nalinginnaasumik aalajangersimasumillu tapersorsorniarlugu Isumaginninnermut Aqutsisoqarfik pilersinneqarpoq. Isumaginninnermut Aqutsisoqarfiup kommunit qanimut suleqatigalugit ineriartorneq, siunnersuineq, pikkorissarnerit il.il. suliarai, taamaasiormigullu pingaartumik meeqqanik inuusuttunillu suliasaqarfimmi unammillernartorpassuit iliuuseqarfiginissaanut aqqinniarnannullu tapertaalluni.

Taamatut oqaaseqarlutik Naalakkersuisut oqallilluarnissamik kissaassipput.